

Leetal ya eepoñee ya pakati
Kolos
Kolos
Waah wa weeyem wa ti leetal
eyye

Aluu pakanam ti káyinan keeyemaam ka ti káasiitan, inci kicanaa.

Leetal eyya nuuyemaa fiye ti káasiitan, Póol akiice yo, akina ti núkuluma. Póol apoñapoñ a ati Eenucee ya, Yéesu Krista. Naakiic yo ti kéeyinane ka keeyem ka ti canku ya eeyem ya ti saatee ya eti Kolos.

Kéeyinane ka pakati Kolos, akee áyiin aña nkasok Epafulas akalañanii kiti ekoonan ya éesuume ya. Epafulas Póol áwiyo.

Po Kolos, intaako pakakee pikalañana keeyeniye kakalañan kéeyinane ka pikee pakalañanal peekufut nin ekoonan ya éesuume ya eti Yéesu Krista. Hikee hinoom, Epafulas naakaay pati Póol pati núkuluma ya, naakamanoo heeyem ha ti pikaayu po. Tempo Póol naakiice leetal eyye ti kéeyinane ka keeyem ka Kolos. Póol naasokii nii, kañañaa hicoku kíp ti tooñaa eyya Epafulas naakalañanii ya. Timpi kacok eeha pakakee pikalañana pa nkayemii ha ti kakalañan. Naasokii nii, ekoonan ya éesuume ya eti Yéesu Krista, ekina lamma eyina kafakan an.

Póol náayisanii nii, Eenucee ya ahaña sempe waah óo waah. Akina ayem Ateeteyo ati waah

óo waah weeliilee, akina ayem Ateeteyo ati waah óo waah weeyem ti púlunta pa. Naasokii nii, eetaake Eenucee ya, ataakaataak waah óo waah ewwa naasoolahe. Háati ninj paka-kee paka kayeniyii kawufan pikee pakalañanal péeyeeni, mpitaak sempe; ninj pakalañanal empuu pinakoolut ninj piti Eenucee ya, eehuu púloonj hiti kincaam. Nene áyisanii, ninj kataakaa Eenucee ya, waah wa weehañe wa panap nkataake, nkataak lombo waah óo waah ewwa nkasoolahe.

Póol náayisanii fa nkañañe elonj, samat nii kéeyinane ka ti ekoonjan ya éesume ya. Naasokii kawaat elonj ya eemaamane ya, nkalonj nii pakan kéeyeeni, samat nii fa an nawaat wañ weemaamane náasoolo wañ wéeyeeni.

Náayisanii, fa elonj ya neeyem ninj aayema áyiin eesaye, aal eenimiye, añii ninj ekina tom amiikan.

Alaapalaka ti káasiitan ka kitaaluu. Alímaati Pútuun pa púwiiniyan saan unaa mpípankin kunuu unaa kati úyiniyaa kasayan hilim etempo ti caacaw Añii etempo Yéesu Krista. Amíini.

Kakican ka

^I Inci Póol yem aluu ti hikiicu. Inci apoñapoñ a ati Yéesu Eenucee ya samat nii Pútuun pa fa mpílañiye fa, ninj Timote an unaa ti káyinan, ukicanaa.

^{II} Aluu keesampanee ka pakati Pútuun pa keeyem ka ti saatee ya eti Kolos, pakanam ti káyinan kéetuule ka Eenucee ya. Alímaati

Pútuun pa Paapaa ati unaa pisampan aluu, mpuwufan aluu kásuumaay.

Póol kaluum ka kiteyoo nin hisoku ha hiteyoo apalaka

III Nuusoksok tan óo tan apalaka Pútuun pa, Paapaa ya ati Ateeteyo Yéesu Krista ati unaa, nin uluuma kiti aluu.

IV Kaatuko úsiyaasi kiti káyinan ka kiti aluu ti Yéesu Eenucee ya, nin pálaŋi empa innitaake pa keesampanee ka púloon pakati Pútuun pa.

V Nitaakaataak oom káyinan nin oom pálaŋi kamma waah ewwa innihine wa tewwo cíki, weemankee wa alacana kamma aluu. Nifiyaafiyo innisiye ewwu ti ekoonan ya eti pánipani ya, eeyem ya ekoonan ya éesuume ya.

VI Samat nii enuun eenape fa néyankii neepuk papukal peenape, fo lombo incuke, ekoonan ya éesuume ya yoopiya ti ehancaloolo pan óo pan ti púlunta pa, néehin pakan paka kapulon samat nii Pútuun pa fa mpílaŋiye fa. Fiyuu lombo néehine ti aluu kápiliŋ ta innisiye ta innimeyi panap pa piti Pútuun pa ti tooŋaa ya.

VII Epafulas, eeyem ya áwii unii amiikan, akalaŋane ho aluu. Akina áhina eehintiyee ati Eenucee ya ati Pútuun pa, náayemi ti páhin ti aluu, ti putum unii.*

VIII Akina asoke unii pálaŋi empa Kunuu ka keenape ka nkuwufane ka aluu.

IX Ekina ewune, unii lombo, kápiliŋ núusiye eehuu, úyekuniit kaluum Pútuun pa kiti aluu. Nuulum kati píhin aluu nípimeyi pántoon eeha

* I:VII 1:7 Nin fotom: náayemi ti páhin ti putum aluu.

mpílafiye ha, Kunuu ka keenape ka nkuwufan aluu kameye nin echato.

X Fiyuu, elon ya eti aluu efeecuk samat nii pakan paka pakati Ateeteyo fa nkañañe fa elon, innihin lombo tan oo tan eeha náalafiye ha. Elon ya etaaluu neetaak papukal peenape, pikina piyem waah oo waah weenape ewwa innihin; innimeyi Pútuun pa pihanhan toko.

XI Nuulum lombo kati puwufan aluu sempe séefulii ti sempe etempo seemaka sa, ancuk kati nitaak sempe ti waah oo waah. Fiyuu efinitaak tan oo tan kamukut, innicok lombo piliit nin pásuuma

XII innisok Paapaa ya apalaka. Akina éehine ya aluu kati níyini hitaaku himpaac ti eeha naamanke ha pakanoo keesampanee ka, ti cáwii ca citi ecaan ya.

XIII Kaatuko áfulanaafulan unaa ti sempe sa siti énimaan ya, náacoo pii unaa ti cáwii ca citi Añiinoo aña náalafiye ya.

XIV Añiinoo awune nuufakanee, umuuyen wa uti unaa nuuponketee.

Eenucee ya ihanu ha hiteyoo hiti waah oo waah

XV Eenucee ya ati Pútuun pa ayem anakool a tak ati Pútuun pa peecukantee pa. Akina ayem Añii ya áyaañ a, naahan waah oo waah weeliilee.

XVI Kaatuko pínapii teyoo Pútuun pa mpiliile waah oo waah weeyem patiila nin t'etaam, ewwa nuucukee wa nin weecukantee wa, pumaleekoo pa piti sempe sa, pumansa pa nin pakati kikaw ka, nin keetaake ka sempe

púlooj. Waah óo waah uliileeliil pínapii teyoo úpinapiyanoo.

XVII Eenucee ya ataakaataako le nin waah óo waah efuutaako, apan ti akina waah óo waah nuutowo ti pitaako.

XVIII Akina ayem hikaw ha, kéeyinane ka kayem eniinoo. Akina ayem píyaañ pa, áyaañ a éelitaniyee ya ti eket ya, kati ayeno áyaañ a ti waah óo waah.

XIX Kaatuko Pútuun pa pílafilafi púmpulunj etempo pipikin ti Eenucee ya.

XX Pínapii teyoo Pútuun pa mpúsuumoole nin waah óo waah kamma hísim ha hiteyoo heeniisee ha ti kuluwaa ya. Fiyuu mpíhine kásuumaay kipitaako ti pututa etempo nin waah óo waah weeyem patiila nin t’etaam.

XXI Aluu lombo, nílanaaalaan hínúm Pútuun pa, inniyeno pikamool etempo kamma heenaput eeha innimiilool ha innihin.

XXII Pale fiye, Pútuun pa píhinaahin aluu nípisuumool nempo pínapii ti eket ya eti Añii etempo. Akina acuke kúnuul ti eniinoo, an-cuk kati níyini pisiijo hátikin etempo samat nii pakan keemuuyenut nkakuul, an átayini kawatan aluu ti waah.

XXIII Pale niñan̄aa putowo ti hicoku piliit ti káyinan ka, innisiijo kíp tenko. Timpí niyesan puson aluu ti cíki eyya innitaake ya kápiliñ ta innisiye ta ekoon̄an ya éesuume ya. Ekoon̄an eyyuu étuunanee-túunan pakan paka púlooj ti etaam ya, apan inci Póol, páhinam fiye káatuunan eteyyo.

Póol páhin pa piteyoo piti káatuunan hilim ha

kéeyinane ka

XXIV Fiye inci taakaa pásuuma ti kúnuul enka inci iyyem ka ti hicuku kamma aluu. Kaatuko loṇaa ti hicuku kúnuul ti eniinam fo fiye, ancuk kati yíni kayankanan enii ya eti Eenucee ya ati Pútuun pa, eeyem ya kéeyinane ka. Pínapii ti kúnuul ka kutoom, inci oopa ti kaahankan ñíyoka ña ñeetowiye ña ñiti Eenucee ya.

XXV Inci fiye áhina ati kéeyinane ka. Pútuun pa puwufanaam páhin empe kati hín po kamma aluu: púpoñiyaampoñ kati túunan hilim etempo púlooj.

XXVI Hilim eehe, pýisanut ho símaama unaa. Pale fiye, mpýisan ho pakan etempo keesampa-nee ka.

XXVII Pílafiyiilafi káyisan nii, eehe mpihintane ha íhinu, apan pýisanut ho an hínúm, eehuu hiyem hisaanumate henfakat, eehe efíhiyeno heenape ti písii pa púlooj. Hikina hiyem: Eenucee ya oopa ti aluu, cíki ya eti hamake ha heeyem ha ti ékey.

XXVIII Unii, kiti Eenucee ya aje núutuunan Pakan paka. Núukupanan an óo an, nuukalaṇan an óo an ti ecohato ya púlooj eyya Pútuun pa mpuwufane ya unii, ancuk an óo an náayini pisiño hátikin Pútuun pa samat nii an éetuuniye ti Eenucee ya.

XXIX Eehe hiwune inci íyyemi ti páhin niṇ kaañañatool niṇ sempe ensa Eenucee ya nawufanam sa, ínsiyemi ti páhin ti inci niṇ sempe.

II

^I Inci láfilafi nípimeyi nii inci oopa ti

kaañañatool kenfakat kamma aluu niñ lombo kamma kéeyinane ka pakati saatee ya eti Lawotise, focaa pakakee kéeyinane ka púloon keetaapala kacukam ka.

II Inci oopa ti kaañañatool enke fiye kamma aluu kati nitaak púsus ínnilafooli, inniyeno pakoonool. Láfilafi lombo Pútuun pa pipisampan aluu meemak ancuk kati nimeen niñ ecohato, ínnihin cíki nii, kameye ka kiti aluu kiti pánipani. Fiyuu éfinimeyi eeha Pútuun pa mpihintane ha, eeha mpíyisanut ha hínum, hikina hiyem Eenucee ya.

III Teyoo pileefaan pa púloon piti ecohato ya niñ kameye ka mpiyolee.

IV Inci sokaasok aluu eehuu ancuk an timpi acaakool aluu niñ kilim kéesuume.

V Háati fa inci íllaaje fa aluu, kunuuwam unka ti aluu, ínsuumam meemak kamma inci ínsiye fa innicokoole fa, innicok kíp ti káyinan ka kiti aluu ti Eenucee ya.

Fa kéeyinane ka elonji neeyem fa ti Eenucee ya ati Pútuun pa

VI Fiye, páawoo nisayanaasayan Ateeteyo Yéesu Eenucee ya, ooto nitowo ti elonj teyoo.

VII Niloc ñínkonk aluu teyoo, innisiinjan lombo elonj ya eti aluu teyoo, innihan innitaake sempe ti káyinan ka kiti aluu samat nii fa innikalañanee fa. Innisok Pútuun pa tan óo tan apalaka.

VIII Nitah kunuu an timpi akuuc aluu niñ kincaam niñ kilim keetaakut hikaw kiti ecohato an. Kilim enkuu kíyiniyini hicuku nii keecohatiye pale pakalañanal piti an lamma,

nkúfulii ti kisaalumant ka kiti púlunta empe apan kúfuliyoot ti Eenucee ya.

IX Kaatuko ti Eenucee ya Pútuun pa púmpulun etempo mpikine, ta mpíyenoonii ta an.

X Teyoo inniyem kéetuuniye pántoon. Akina ayem ati hikaw ha ati sempe sa púloon siti patiila.

XI Teyoo lombo inniyem keenakanee. Kanakan enkuu kineetaat kiti sipees an pale kanakan kéefulii ti Eenucee ya. Kanakan enkuu kiyem ta Eenucee ya naawaate ta aluu ti elonj eti kaamuuyen.

XII Ta ínnihinee ta pátise, cukaacuk fiye nii nihokeehok ninj Eenucee ya. Innílitaniyee lombo ti eket ya neyoo, kaatuko níyinanaayinan ti sempe sa siti Pútuun pa péelitaniiyoo pa ti eket ya.

XIII Niyenaayeno hínum pakan keekete kamma umuuyen wa uti aluu, apan elonj ya eti aluu eti kaamuuyen ka ewaatutee fala. Pale fiye Pútuun pa píhinaahin aluu nípiyemi kalonja ninj Eenucee ya. Mpuponket umuuyen wa uti unaa púloonj.

XIV Púkoo ya eeyekane ya umuuyen wa utu-unaa,* Pútuun pa pipempenaa-pempenj yo ti kuluwaa ya púpufulan yo.

XV Mpuwaat kisaalumant ka keetaake ka sempe, mpicenk ko mpuweel ko hátikin pakan paka púloonj, mpilelentoole nenko pípiyisan nii piheekaaheek ko ti kuluwaa ya eti Eenucee ya.

XVI Ooto an timpi awatan aluu ti waah ewwa

* **II:XIV 2:14** Ninj ekina tom: “Púkoo ya eesiinjane ya unaa ti pisiya kamma núutuulutaa yo,”

innili wa innilaan, niŋ fotom fa innituulut fa ñikee ñihaaño ña ñiti Pusuwif pa. An lombo timpi awatan aluu nii, nítuulantoo hinoom ha hiteyii hiti kayeno ka, niŋ hinoom ha hiti éfulii hiim ha.

XVII Enkuu púloon, kinakoolut tak niŋ waah wa weeñaŋe wa ékey, pale samat nii hísaalumant etewwo lamma. Himuum ha hiti hísaalumant eehuu hiyem Eenucee ya.

XVIII Pakakee paka nkálafilafi éyisanoolo nii keewananooliye, apan ti saanii keesilanooliye. Pakakee paka nkasok nii an óo an añaña ékilipo hátikin pumaleekoo pa. Pakakee paka lombo, nkámakiyanoolo-mákiyanoolo kamma waah ewwa nkacuk wa ti píyawut. Pakan paka payenkuu fiye púloon, timpi nikatanii kápupuulan aluu ti kaapuũaanoolee ka kiti aluu. Pámiiloolalii piti etaam eeye mpuwasii éseepinoolo, apan pitaakut nafaa.

XIX Kacokut ti Eenucee ya, eeyem a hikaw ha hiti kéeyinane ka, keeyem ka eniino. Samat nii fa pifasa pa niŋ picc pa mpucokool fa pitempo tak, fo lombo Eenucee ya, eeyem a hikaw ha, náhin kéeyinane ka kapucokool nkayank ti káyanan ka kiteyii samat nii fa Pútuun pa mpílafiye fa.

Eket niŋ elon niŋ Eenucee ya ati Pútuun pa

XX-XXII Eenucee ya naafakan aluu ti sempe sa siti kisaalumant ka kiti púlunta pa, kamma innikete neyoo. Ooto weyme uwune elon aluu neecuk nii pakan paka pakati púlunta pe? Pakakee paka nkasok aluu: “Timpi nicok waah ewwe!

Timpi nisiikan waah ewwe! Timpi nílík waah ewwe!”? Pale waah ewwe éfuucim, utaakut nafaa! Ooto weyme uwune innicoon kilim enkuu? Pakan kasiinjane ko, nkakalanjan ko pakan paka.

XXIII Pánipani kilim ka keesiinjane enkuu kucukaacuk nii kiti ecohato, kaatuko kicakanaacakan an kati nátuul cosaan, naawananoolo naaseeñan eniinoo. Pale kilim enkuu kitaakut nafaa, kamma nkiyinaat hikitu an hilonju elon eti kaamuuyen.

III

I Eenucee ya ati Pútuun pa álitaniyeelitan ti eket ya, aluu lombo ínilitaniyee neyoo. Ooto niñes waah wa weeyem wa patiila, pa Eenucee ya naayeniye pa look ti epees yáali ya eti Pútuun pa.

II Nímiilool waah wa weeyem wa patiila lamma, timpi nímiilool waah uti t’etaam.

III Kaatuko niketaaket, elon ya eti aluu neeyolee niñ Eenucee ya eeyem ya oonool niñ Pútuun pa.

IV Eenucee ya ayem elon ya eti aluu pánipani. Niñ áfuliyoo, aluu lombo éfinifulii neyoo inninanf ti hamake ha hiteyoo.

V Ooto nimuk waah óo waah weeyem ti aluu uti etaam ya: casupoolat, káakuulaati, pacul, pálañi peenaput niñ pakiip waah fo muus, kaatuko an eekiipe waah fo muus, nacokcok wo pihañ Pútuun pa.

VI Pawenal empuu fiyaaw puwune káñiken ka kiti Pútuun pa nkikaakaay ékey ti kéetuulut po ka.

VII Aluu lombo, fiyuu inniwen hínum, ta in-niyeniye ta ti elonj eti umuuyen ewwu.

VIII Pale fiye, nikatan eehe púloonj: kanat, káñiken, pakanc, púkuuf, ninj káakup kilim keefute.

IX Timpi nicaamool, kaatuko niwaataawaat kunuu ka kiti aluu keemaamane ka ninj pawenal etenko,

X ínnisoolo kunuu ka kéeyeeni ka. Aluu unka ninakoole pihanhanj toko samat nii Eeliile ya aluu, ancuk nihaña innimeya po.

XI Fiye, taakut nene “añe Asuwif” ninj fotom “añe Asuwif tom”, “añe eenakiye”, “añe eenakiit”, “añe akaawoola”, “añe ati elampa”, “añe amiikan” ninj fotom “amiikan tom”. Pale Eenucee ya ayem waah óo waah náayemi ti an óo an.

XII Páawoo Pútuun pa pílafiye aluu mpimamal aluu nipiyeno pakan etempo, ooto nitaak paket hikaw, niyeno pakan keenape, keewananooliye, kéesumanana ninj pumukuta.

XIII Nimukutool ninj an óo an, inniponketool ninj an amuuyenaa ti akee. Niponketool samat nii fa Eenucee ya* naaponkete fa aluu.

XIV Heehañe ha púloonj hitaaku hikaw hiyem, nílafooli. Pálafi nananfool pakan pitempo tak.

XV Kásuumaay enka Eenucee ya nawufan ka, nikat ko kípítintinjan saan aluu. Pútuun pa piyonkale aluu ti kásuumaay enke kati niyeno enii yoonool. Nisok tan óo tan Pútuun pa apalaka.

* III:XIII 3:13 Ninj ekina tom: Ateeteyo

XVI Hilim ha hiti Eenucee ya hikin ti aluu samat nii hisaanumate henfakat. Nikalañanool, inniwunool kunuu ti ecohato ya púloon. Nicook kícimu óo kícimu kiti Pútuun pa, innicook ko nin saan aluu ti hisoku po apalaka.

XVII Waah óo waah ewwa ínnihin nin fotom innisok, níhin wo ti caacaw ca citi Ateeteyo Yéesu, innisok Pútuun pa Paapaa ya apalaka pínapii teyoo.

Fa kéeyinane ka nkañañe fa elon

XVIII Aluu pakaal paka, nítuul pákayiin aluu, samat nii pinapana Ateeteyo.

XIX Aluu pákayiin paka, nílaŋi pakaal aluu, apan timpi nikallanii.

XX Aluu epuuk ya, nítuul pupuka aluu ti waah óo waah, eehuu níhisuum Ateeteyo.

XXI Aluu níŋaaf ña, timpi níhin epuuk aluu kápiñiken kenseñ, nin fotom éfikawusen.

XXII Aluu pimiikan pa, nítuul payenka inniyem ka teyii ti páhin leti etaam ye ti waah óo waah. Timpi nítuulii lamma nin unka ti efaas aluu, ancuk kati súmii ti aluu. Pale nítuulii nin saan seekuule kamma innifeye Ateeteyo.

XXIII Páhin óo páhin empa inniyem ti íhinu, níhin po ti saan aluu púloon, samat nii keeyem ti páhin Ateeteyo, pale pakan paka tom.

XXIV Nímeyimeyi nii Pútuun pa efipupuuñanool aluu nin heenape ha eeha mpimanke ha pakan etempo. Aña inniyem a teyoo, ínniyemi ti páhin teyoo, ayem Eenucee ya Ateeteyo.

XXV Pale an óo an éehinut pinap, afaacooyee heenaput eeha náahine ha, kaatuko Pútuun pa pifisakanoolantoo an.

IV

I Aluu pakati kikaw ka keetaake ka pimiikan, niwufanii heecoonoole nihitempo. Nínawuno nii aluu lombo nitaakaataak ati hikaw eeyem alacana.

Heeñañee ha íhinu

II Nicok piliit ti kaluum ka; inniyeniyaa kaluum, niyeno niñ kunuu aluu innisok Pútuun pa apalaka.

III Niluum kiti unii lombo ancuk Pútuun pa mpípankin unii pítin kati útuunan hilim etempo pakan paka. Hilim eehe hiyem eeha mpíyisanut ha hínum. Kamma inci íntuunane ho, ekina ewune íyyemi ti núkuluma.

IV Ooto niluum Pútuun pa inci kati túunan ho picaañ catañ samat nii fa inci iññañe fa.

V Niwen niñ ecohato hátikin kéeyinanut ka. Innitaakaa káasiñuma keetempiye kiti íhinuyii heenape, timpi nípuul ko.

VI Níkup tan óo tan hilim heenape, apan nihitaak micempanu, ancuk kati nímeyi fa efiniñahan an óo an.

Kakican kikelan

VII Tikik afaakaman aluu fa inci iyyem. Akina an unaa ti káyinan, aña núulafiye meemak, náayemi lombo áhina eehintiyee, áwii unii ami-ikan ti Ateeteyo.

VIII Inci púpoñiyoo ti aluu kati akaman aluu fa nuuyem, naayankanan aluu lombo nipitaak púsus.

IX Inci púpoñiyoo niñ Onesim, ati aluu ya. Akina lombo an eehintiyee, an unaa ti káyinan, apan núulafiyoo meemak. Efikakaman aluu waah óo waah weetaakiye pe.

X Alistaak eeyem ya niñ inci ti núkuluma, akicanaa aluu. Mark lombo, Barnabas atuwoo, akicanaa aluu. (Nisayaasa leetal éeyisane puume inniñañe íhinu kiteyoo. Niñ ákeyyoo puu, niwananoo pinap.)

XI Yéesu, aña nkasok ya Yustus, akicanaa aluu lombo. Ti Pusuwif pa kéeyinane ka Eenucee ya ati Pútuun pa, pákahaaciil paka payenke lamma kayem ti páhin niñ inci káputuunan cáwii ca citi Pútuun pa, apan nkapenanam-penan sempe lombo.

XII Epafulas, eeyem a lombo an aluu, akicanaa aluu. Akina amiikan ati Yéesu Eenucee ya, apan tan óo tan nasuumsuum kiti aluu ti kaluum meemak, ancuk kati nicok kíp innituuno ti káyinan ka kiti aluu, íhiini aluu hat ti waah óo waah ewwa Pútuun pa mpílafiye.

XIII Inci yíniyini aluu hisoku nii, oopa ti páhin penfakat hak aluu niñ kéeyinane ka keeyem ka Lawotise niñ Yelapolis.

XIV Luk, ákuuñana ya aña inci íllafiye ya, akicanaa aluu niñ Temas lombo.

XV Nikican pakan unaa ti káyinan keeyem ka Lawotise, innikican lombo Nimufa niñ kéeyinane ka ti Yéesu Krista payenka nkaconcoolo ka lateyoo.

XVI Nin kakalanɔaa aluu leetal eyye, innipoñ yo kéeyinane ka pakati Lawotise, kapikalanii yo lombo. Aluu lombo nikalan leetal eyya pakati Lawotise éfikapoñii ya aluu.

XVII Nisok Aakip, atah kunuu ti páhin empa Ateeteyo naawufanoo pa, ancuk kati ahankan po pinap.

XVIII Inci Póol kiice kakican enke nin epeesam. Nínawuno nii inci oopa ti núkuluma! Pútuun pa pisampan aluu.

Kuloonaay
Karon: Kuloonaay (Portions)

copyright © 2018-2025 Wycliffe Bible Translators, Inc.

Language: Karon

Contributor: SIL International (in Africa)

All rights reserved.

2025-07-11

PDF generated using Haiola and XeLaTeX on 10 Jul 2025 from source files
dated 11 Jul 2025

404e2c05-c6eb-5f56-8cae-50a5b595ef9a